

So ñ lütt Stück Riek von'n Heven

Immer wenn en Kind döfft ward, denn kümmt uk dat Wurt von Jesus von Nazareth vör: Lat de Kinner to mi kamen un wiest se nich af. Denn Minschen, so as dat Kinner sünd, hüürt dat Riek in ñ Heven. Ik segg juch, wecker dat Riek von unsen Vadder in ñ Heven nich annehmen deit, so as een Kind, de wart dor uk nich rinnerkamen.

Nu is dat Riek in'n Heven ja nich up Wulk Söben oder süsswo baben uns, ne, dat is midden unner uns, dörch unsen Herrn Jesus. Wenn dat nu so is, denn lohnt sik dat allemal, up uns Kinner to achten un dorup, wat se denn anners maken as wi Groten. Nu, wo Ferientied in Meckelnborg-Vorpommern is, könnt w' vele Kinner an de Ostsee, an de Seenplatt oder süsswo buten bi t Speelen un Toben beleven. Ik hoff, so veel von ehr as möglich sünd ok buten to finnen un nich binnen bi Facebook, Notebook un Kiekschapp.

Grad bi uns lütten Klabautes köönt w' bi ehr Speelwarken tosehn. Se gahn meistens open un friemötig mit sik üm. Wenn se speelen, denn maken se dat mit Andacht, as wörden s' warken. Denn kümmt't ok vör, dat se sik vertüörn, aber ehr Geblaar is woll mächtig, aber kort un büninig. Dorna speelt se wieder, as wier nix west. Wat ehr Öllern för ñ Stand innehen, ob se veel oder wenig verdienen, ob se miehr oder weniger in ehren Brägen hebben, speelt keen Rull. Wat tellt, is, de Lütten sünd tohop un speelen. Dat is goot so.

Ik fraag mi denn immer, is dat nich so ñ lütt Stück Riek von'n Heven? Kööhen wi nich, grod un lütt, liehren, dat all tohop Kinner von unsen Vadder in'n Heven sünd? Un uns Vadder in'n Heven leevt uns all glik.

Ik mücht düsse Ferientied as ñ Hülp verstahn, mit Kinner un so as Kinner dat können, sik över uns Leven, uns Globen un den Sommer to freugen.